

周易經典證略

周易經典證略 卷三

彖上傳

大哉乾元萬物資始乃統天

公羊傳曰何言乎王正月大一統也

隱公元年

孝經曰資於事父以事君

荀子君道篇曰四統者俱而天下歸之

時乘六龍以御天

許慎五經異義曰天子駕六易時乘六龍以御天

坤厚載物德合无疆

公羊傳曰疆運田者何與莒爲竟也

昭公元年

牝馬地類

漢書食貨志曰地用莫如馬

蒙以養正聖功也

書洪範曰曰聖時風若曰咎徵節曰蒙恆風若

以此毒天下而民從之

周禮天官醫師曰掌醫之政事聚毒藥以共醫事

呂氏春秋孟秋紀曰若用藥者然得良藥則活人得惡藥則殺人義兵之爲天下良藥也亦大矣

剛中而志行乃亨

穀梁傳曰乃者亡乎人之辭也

則是天地交而萬物通也

禮記月令曰天氣下降地氣上騰

唯君子爲能通天下之志

大學曰此謂唯仁人唯能愛人

故日月不過而四時不忒

續漢書律厯志曰兩儀既定日月始離初行生分積  
分成度日行一度一歲而周 又曰察日月俱發度

端日行十九周月行二百五十四周復會於端

先甲三日後甲三日天行也

白虎通闕文郊祀曰祭日用丁與辛者何先甲三日  
辛也後甲三日丁也皆可以接事昊天之日故春秋  
傳曰郊以正月上辛日尚書曰丁巳用牲于郊牛二  
卜觀而化也

春秋傳曰容止可觀進退可度

襄公三十一年

漢書五行志曰木東方也于易地上之木爲觀其于  
王事威儀容貌亦可觀者也

聖人以神道設教而天下服矣

禮記祭義曰宰我曰吾聞鬼神之名不知其所謂子曰氣也者神之盛也魄也者鬼之盛也合鬼與神教之至也 又曰因物之精制爲之極明命鬼神以爲黔首則百官以畏萬民以服

動而明

書呂刑曰德威維畏德明維明

觀乎天文以察時變

周禮考工記曰土以黃其象方天時變

惟畫天則隨時而變色也

不家食吉養賢也

孟子曰弗與其天位也弗與治天職也弗與食天祿也士之尊賢者也非王公之尊賢也

聖人養賢以及萬民

周禮地官鄉大夫曰此謂使民興賢出使長之使民興能入使治之

彖下傳

男下女

惠氏曰易氣從下生故以下爲先上爲後也且艮男在下兌女在上

儀禮士昏禮曰壻御婦車授綏御輪三周先俟於門

外惠氏曰皆男  
下女之事

遯之時義大矣哉

中庸曰君子依乎中庸遯世不見知而不悔唯聖者  
能之

天地解而雷雨作雷雨作而百果草木皆甲坼

禮記月令曰孟春之月日在甲乙

漢書五行志曰雷以二月出

二簋應有時

孝經曰春秋祭祀以時思之



姤遇也

穀梁傳曰不期而會曰遇

桓公八年

鼎象也

周禮天官曰亨人掌其鼎饔

饗而耳目聰明

中庸曰唯天下至聖爲能聰明睿知足以有臨也

艮其止止其所也上下敵應不相與也是以不獲其身

說文曰艮很也

江氏曰言輔不言口言身不言而言腹不言脊言限不言腹言腓不言股

言趾不言足皆不獲其身之象

日中則昃

周禮地官司市曰大市日廛而市

註必日廛者遠地乃可至也

月盈則食

詩十月之交集傳曰厯法周天三百六十五度四分度之一左旋於地一晝一夜則其行一周而又過一度日月皆右行於天一晝一夜則日行一度月行十三度十九分度之七故日一歲而一周天月二十九日有奇而一周天又逐及於日而與之會一歲凡十二會方會則月光都盡而爲晦已會則月光復蘇而

爲朔朔後晦前各十五日日月相對則月光正滿而  
爲望晦朔而日月之合東西同度南北同道則月揜  
日而日爲之食望而日月之對同度同道則月亢日  
而月爲之食

天地盈虛與時消息

漢書厯律誌曰天之中數五地之中數六而二者爲  
合六爲虛五爲聲周流於六虛虛者爻律

史記厯書曰太史公曰神農以前尙矣蓋黃帝考定  
星厯建立五行起消息

兌說也

說文曰兌說也

謂講說之說

說懌也

謂悅懌之悅古无悅字

呂氏春秋勸學篇曰凡說者兌之也非說之也今世之說者多弗能兌而反說之夫弗能兌而反說是拯溺而碰之以石也是救病而飲之以堇也

天地節而四時成

漢書律曆志曰經元一以統始易太極之首也春秋二以日歲易兩儀之中也於春每月書王易三極之統也於四時雖無事必書時月易四象之節也時月

以建分至啟閉之分易八卦之位也

濡其尾

戰國策曰易曰狐濡其尾

周易經典證略 卷四

象上傳

君子以自強不息

禮記表記曰君子莊敬日強

陰始疑也

禮記月令曰孟冬之月水始冰

龍戰于野其道窮也

後漢書朱穆傳曰穆伏念明年丁亥之歲刑德合于乾位易經龍戰之會其文曰龍戰于野其道窮也謂

周易系辭下  
陽道將勝而陰道負也

以貴下賤大得民也

春秋傳曰王曰其君能下人必能信用其民矣  
宣公十二年

以從禽也

周禮夏官大司馬曰大獸公之小禽私之

衍在中也

周禮春官大祝曰辨九祭一曰命祭二曰衍祭

患至援也

援古作援

詩召南草蟲曰憂心悒悒

承天寵也

詩商頌長發曰何天之龍

傳龍當作寵

先王以建萬國親諸侯

禮記月令曰立夏之日天子親帥三公九卿大夫以

迎夏于南郊還反行賞封諸侯

惠氏曰卦氣比四月卦

素履之往獨行願也

中庸曰莫見乎隱莫顯乎微故君子慎其獨也

君子以類族辨物



春秋傳曰公孫揮能知四國之為而辨于其大夫之

族姓班位貴賤能否而又善為辭令襄公三十一年

義弗克也

穀梁傳曰未伐而曰弗克何也弗克其義也文公十四年

積中不敗也惠氏曰車債曰敗

春秋傳曰庚戌鄭伯之車債于濟隱公三年

易而无備也

春秋傳曰請先者去備薄威後者敦陳整旅昭公二十三年

殷薦之上帝以配祖考

公羊傳曰大禘者何合祭也其合祭奈何殷廟之主陳于大祖未毀廟之主皆升合食于大祖五年而再

殷祭

文公二年

周禮天官庖人曰以共王之膳與其薦羞之物

孝經聖治章曰昔者周公郊祀后稷以配天宗祀文

王於明堂以配上帝

惠氏棟曰卦氣豫在卯爲二月中

君子以嚮晦入宴息

詩小雅北山曰或燕燕居息

亦可醜也

詩國風牆茨曰所可道也言之醜也

觀國之光尚賓也

孝經曰是以四海之內各以其職來祭

義弗乘也

尚書大傳曰古之帝王必有命民民能敬長憐孤取  
舍好讓舉事力者命於其君得命然後得乘飾車駟  
馬衣文駢錦未有命者不得衣不得乘乘衣有罰  
君子得與

荀子王制篇曰馬駭輿則君子不安輿庶民駭政則

君子不安政馬駭輿則莫若靜之庶人駭政則莫若惠之

商旅不行

周禮考工記曰通四方之珍異以資之謂之商旅

物與无妄

漢書谷永傳曰遭无妄之卦運

先王以茂對時育萬物

詩大雅皇矣曰帝作邦作對

以辟咎也

春秋傳曰知季曰原屏咎之徒也

宣公十二年

日昃之離

春秋曰丁巳葬我君定公雨不克葬戊午日下吳乃

克葬

定公十五年

象下傳

滕口說也

滕虞氏作滕滕古文騰

儀禮燕禮曰滕觚于賓

滕送也

婦人貞吉從一而終也

禮記郊特牲曰壹與之齊終身不改故夫死不嫁

有疾憊也

公羊傳曰莊王曰何如司馬子反曰憊矣曰何如曰  
易子而食之析骸而炊之莊王曰嘻甚矣憊

宣公十五年

乃大得也

公羊傳曰乃者何難也而者何難也曷爲或言而或

言乃乃難乎而也

宣公八年

以中節也

中庸曰喜怒哀樂之未發謂之中發而皆中節謂之

和

姤后以施命誥四方

後漢書魯恭傳曰案易五月姤用事經曰后以施令誥四方言君以夏至之日施命令止四方行者所以助微陰也

君子以除戎器戒不虞

詩大雅抑曰脩爾車馬弓矢戎兵用戒戎作

君子以治厯明時

書堯典曰乃命羲和欽若昊天厯象日月星辰敬授人時

君子以正位凝命

書皐陶謨曰庶績其凝

終无尤也

詩國風載馳曰許人尤之

鄭箋尤過也

失其義也

說文義己之威儀也

詩國風柏舟曰威儀棣棣

止諸躬也

禮記射義曰反求諸己而已矣

不素飽也



詩國風伐檀曰不素餐兮

其羽可用爲儀吉不可亂也

禮記曲禮曰前有車騎則載飛鴻

過旬災也

禮記曲禮曰凡卜筮日旬之外曰遠某日旬之內曰

近某日

江氏曰離納己震納庚至己逆數至庚爲旬自離初至震四也過庚復己則爲離之四當

有災如之象故

曰過旬災也

上逮也

漢書刑法志曰齊大倉令擅于公有罪當刑詔獄逮

繫長安瘡于公無男有五女當行會逮罵其女曰生子不生男緩急非所益也

失時極也

詩周頌思文曰莫匪爾極

周禮天官曰體國經野設官分職以爲民極

已亢也

亢古頤字

詩國風燕燕曰頤之頤之

毛傳曰飛而上曰頤飛而下曰頤江氏曰晉上之三

晉離飛鳥下翔之三也○晉三往上來成小過晉外卦離離爲飛鳥

頤也

莊子山木篇曰莊子衣大布而補之正廩係履而過  
魏王魏王曰何先生之憊邪莊子曰貧也非憊也士  
有道德不能行憊也衣敝履穿貧也非憊也

周易經典證略 卷五

繫辭上傳

八卦相盪

惠氏曰蕩動也  
六經無盪字

禮記月令曰諸生蕩

鼓之以雷霆潤之風雨日月運行一寒一暑

禮記樂記曰地氣上齊天氣下降陰陽相摩天地相  
蕩鼓之以雷霆奮之以風雨動之以四時煖之以日  
月而百化興焉

三極之道也

逸周書小開武曰三極一維天九星二維地九州三

維人四左

左佐也

齊小大者存乎卦

詩小雅小宛曰人之齊聖

是故知鬼神之情狀

漢書賈誼傳曰文帝思誼徵之至入見上方受釐坐

宣室上因感鬼神事而問鬼神之本誼具道所以然

之故至夜半文帝前席旣罷曰吾久不見賈生自以

爲過之今不及也

以言乎天地之間則備矣

禮記樂記曰樂著大始而禮居成物著不息者天也  
著不動者地也一動一靜者天地之間也

而擬諸其形容

周禮冬官函人曰凡爲甲必先爲容

其臭如蘭

詩國風鄭風曰方秉蘭兮

毛傳曰  
蘭蘭也

荀子宥坐篇曰且夫芷蘭生於深林非以無人而不

芳

致恭以存其位者也

書鴻範曰一曰貌節貌曰恭

治容誨淫王肅作野  
容悔淫

文選上林賦曰若夫青琴宓妃之徒絕殊離俗妖冶

嫺都

五位相得而各有合

春秋傳曰陳水屬也火水妃也而楚所相也今火出

而火陳逐楚而建陳也妃以五成

昭公九年○天  
幹隔五而合

又曰水火之牡也其以丙子若壬午作乎水火所以

合也

昭公十七年

楊子太元曰一六爲水二七爲火三八爲木四九爲金五十爲土

將有行也問焉而以言

周禮春官箬人曰掌三易以辨九箬之名一曰連山二曰歸藏三曰周易九箬之名一曰巫更二曰巫咸三曰巫式四曰巫目五曰巫易六曰巫比七曰巫祠八曰巫參九曰巫環以辨吉凶凡國之大事先箬而後卜上春相箬凡國事共箬



易无思也无爲也

荀子天論篇曰故大巧在所不爲大智在所不慮  
唯神也故不疾而速

續漢書律厯志賈逵論曰五紀論日月循黃道南至  
牽牛北至東井率日日行一度月行十三度十九分  
度七也

又曰天之動也一晝一夜而運過周星從天而西日  
違天而東日之所行與運周在天成度在厯成日居  
以列宿終於四七受以甲己終於六旬日月相推日

舒月速

冒天下之道

惠氏曰  
冒觸也

周語曰且其狀方上而銳下宜觸冒人王其勿賜

簡王

八年

漢書衛青傳曰直冒漢圍西北馳去

聖人以此洗心

禮記祭義曰昔者聖人建陰陽天地之情立以爲易  
易抱龜南面天子卷冕北面雖有明知之心必進斷  
其志焉示不敢專以尊天也

是興神物以前民用

管子水地篇曰伏閭能存而能亡者蓍龜與龍是也  
龜生於水發之於火於是爲萬物先爲禍福正  
是故易有大極是生兩儀

禮記禮運曰夫禮必本於太一分而爲天地

呂氏春秋仲夏紀曰太一出兩儀

吉凶生大業

周禮春官大宗伯曰以吉禮事邦國之鬼神示  
又曰以凶禮哀邦國之憂

縣象著明莫大乎日月

參同契曰天符有進退詘伸以應時故易統天心復卦建始萌長子繼父體因母立兆基消息應鍾律升降據斗樞三日出爲爽震庚受西方八日兌受丁上弦平如繩十五乾體就盛滿甲東方蟾蜍與兔魄日月氣雙明蟾蜍視卦節兔魄吐生光七八道已訖屈折低下降十六轉受統巽辛見平明艮直於丙南下弦二十三坤乙三十日東北喪其朋節盡相禪與繼體復生龍壬癸配甲乙乾坤括始終七八數十五九

六亦相應四者合三十陽氣索滅藏

成天下之亹亹者

爾雅釋詁曰亹亹勉也

天垂象見吉凶聖人象之

虞書皐陶謨曰天命有德五服五章哉天討有罪五  
刑五用哉

設卦以盡情僞

春秋傳曰使乘車者左實右僞以旆先

襄公十八年

乾坤其易之緼耶

緼與緼蘊古今字通

論語曰韞匱而藏諸

不言而信

詩商頌烈祖曰奏假無言時靡有爭

中庸曰故君子不動而敬不言而信

周易經典證略 卷六

繫辭下傳

夫坤隤然示人簡矣

春秋傳曰大閱簡車馬也

桓公六年○惠氏曰坤以藏之故閱藏萬物示人簡

者也

天地之大德曰生聖人之大寶曰位

詩大雅崧高曰維嶽降神生甫及申

又商頌元鳥曰天命元鳥降而生商

抱朴子曰支干上生下爲寶

惠氏曰甲午乙巳是也

斲木爲耜揉木爲耒

周禮考工記曰匠人爲溝洫耜廣五寸二耜爲耦

又曰車人爲耒底長尺有一寸中直者三尺有三寸  
上句者二尺有二寸自其底緣其外以至於首以弦  
其內六尺有六寸與步相中也堅地欲直底柔地欲  
句底直底則利推句底則利發倨句磬折謂之中地  
日中爲市

周禮地官司市曰大市日廛而市百族爲主朝市朝  
時而市商賈爲主夕市夕時而市販夫販婦爲主凡



市入則胥執鞭度守門市之羣吏平肆展成奠賈上  
旌于思次以令市市師泄焉而聽大治大訟胥師賈  
師泄于介次而聽小治小訟凡萬民之期于市者辟  
布者量度者刑戮者各于其地之敘凡得貨賄六畜  
者亦如之三月而舉之

黃帝堯舜垂衣裳而天下治

書益稷曰予欲觀古人之象日月星辰山龍華蟲作  
會宗彝藻火粉米黼黻絺繡以五采彰施于五色作  
服汝明

後世聖人易之以宮室

爾雅釋宮曰宮謂之室室謂之宮

又釋山曰大山宮小山

不封不樹喪期无數後世聖人易之以棺槨

周禮春官冢人曰以爵等爲邱封之度與其樹數

禮記檀弓曰國子高曰葬也者藏也藏也者欲人之

弗得見也是故衣足以飾身棺周於衣槨周於棺土

周于槨反壤樹之哉

後世聖人易之以書契

周禮天官小宰曰六曰聽取予以書契七曰聽賣買以質劑

尺蠖之屈以求信也

說文曰尺蠖屈伸蟲也

楊子方言曰螂蠖謂之尺蠖

動而不括

不鄭讀  
爲拊

書太甲曰若虞機張往省括於度則釋

有不善未嘗不知知之未嘗復行也

論語曰孔子對曰有顏回者好學不遷怒不貳過

中庸曰子曰回之爲人也擇乎中庸得一善則拳拳服膺而弗失之矣

其言曲而中

周禮地官師氏曰居虎門之左司王朝掌國中失之事

史記封禪書曰康王死他姬子立爲王而康后有淫行與王不相中

易之興也其於中古乎

漢書藝文志曰易道深矣人更三聖世歷三古

孟康曰易

蔡辭曰易之興其於中古乎然則伏羲爲上古文王爲中古孔子爲下古

是故履德之基也

春秋傳曰晉侯使卻錡來乞師將事不敬孟獻子曰卻氏其亡乎禮身之幹也敬身之基也卻子無基且先君之嗣卿也受命以求師將社稷是衛而情奔君

命也不亡何爲

成公十三年

巽德之制也

春秋傳曰大國制義

成公八年

益長裕而不設

周禮考工記曰桃氏爲劍節中其莖設其後

履以和行

論語曰有子曰禮之用和爲貴先王之道斯爲美小  
大由之有所不行知和而和不以禮節之亦不可行  
也

周流六虛

史記龜策列傳曰日辰不全故有孤虛

裴駰曰甲乙謂之日子丑

謂之辰六甲孤虛法甲子旬中無戌亥戌亥爲孤辰  
巳卽爲虛甲戌旬中無申酉申酉爲孤寅卯卽爲虛  
甲申旬中無午未午未爲孤子丑卽爲虛甲午旬中  
無辰巳辰巳爲孤戌亥卽爲虛甲寅旬中無子丑子

丑爲孤午未卽爲虛○  
按此卽六虛之實證

人謀鬼謀百姓與能

書洪範曰汝則有大疑謀及乃心謀及卿士謀及庶  
人謀及卜筮

周易經典證略 卷七

文言傳

亨者嘉之會也

周禮地官媒氏曰仲春之月令會男女

惠氏曰昏禮稱嘉

利者義之和也

荀子王制篇曰人何以能羣曰分分何以能行曰以義故義以分則和和則一一則多力多力則彊彊則勝物故宮室可得而居也故序四時裁萬物兼利天下無它故焉得之分義也



貞固足以幹事

春秋傳曰元體之長也亨嘉之會也利義之和也貞事之幹也體仁足以長人嘉德足以合禮利物足以

和義貞固足以幹事

襄公九年

樂則行之憂則違之

春秋傳曰是故審則宜類以制六志哀有哭泣樂有歌舞喜有施舍怒有戰鬪喜生於好怒生於惡是故審行信令禍福賞罰以制死生生好物也死惡物也好物樂也惡物哀也哀樂不失乃能協于天地之性

是以長久

昭公二十五年

閑邪存其誠

說文曰閑闌也

高而無民

淮南子繆稱篇曰同言而民信信在言前也同令而民化誠在令外也聖人在上民遷而化情以先之也動于上不應于下者情與令殊也故易曰亢龍有悔純粹精也

荀子非相篇曰粹而能容雜夫是之謂兼術

君子學以聚之

漢博陵太守孔彪碑曰龍德而學

夫大人者

淮南子泰族訓曰故大人者與天地合德日月合明  
鬼神合靈與四時合信故聖人懷天氣抱天心執中  
含和不下廟堂而衍四海變習易俗民化而遷善若  
性諸己能以神化也

非一朝一夕之故其所由來者漸矣

史記太史公自敘曰春秋之中弑君三十六亡國五

十一諸侯奔走不得保其社稷者不可勝數察其所  
以皆失其本已故易曰失之豪釐差以千里故曰臣  
弑君子弑父非一旦一夕之故也其漸久矣

蓋言順也

管子七法篇曰漸也順也靡也久也服也習也謂之  
化

妻道也

春秋傳曰水火之牡也

昭公十七年

美在其中而暢于四支

春秋傳曰中美能黃上美爲元下美則裳

昭公十二年

夫元黃者天地之雜也天元而地黃

禮記鄉飲酒義曰天地嚴凝之氣始於西南而盛於西北此天地之尊嚴氣也此天地之義氣也天地溫厚之氣始於東北而盛於東南此天地之盛德氣也此天地之仁氣也

周禮考工記曰畫續之事雜五色東方謂之青南方謂之赤西方謂之白北方謂之黑天謂之元地謂之黃青與白相次也赤與黑相次也元與黃相次也

周易經典證略 卷八

說卦傳

故易六位而成章

春秋傳曰爲九文六采五章以奉五色

昭公二十五年○杜氏註

引考工記曰青與赤謂之文赤與白謂之章白與黑謂之黼黑與青謂之黻五色備謂之繡

爲圖

周禮考工記轉人曰蓋之圖也以象天也

淮南子天文訓曰天道爲圖

爲均

惠氏曰均當讀爲荀

說文曰十日爲旬

惠氏曰坤數十故爲旬○按旬周禮本作均周禮地官均人曰豐年

則公旬用

三日焉

爲子母牛

春秋傳曰純離爲牛

昭公五年○惠氏曰離坤之子也坤離皆牛故爲子母牛也

爲文

楚語觀射父曰天事武地事文民事忠信

爲柄

惠氏曰柄當作枋通方

淮南子天文訓曰地道曰方

爲大塗

文選西京賦曰參塗夷庭

鄭氏曰國中三道曰塗震上值房塗而大者取房有

三塗

焉

爲弓輪

參同契曰上弦兌數八下弦艮亦八

惠氏曰坎爲月月在庚爲弓在

甲象輪故爲弓輪也按虞樞納甲爲言又坎在丁上弦在丙下弦賈誼新書曰古之爲路輿三十輻以象月是也

爲閤寺

周禮天官閤人曰掌守王宮之中門之禁喪服凶器不入宮潛服賊器不入宮奇服怪民不入宮凡內人



宮器賓客無帥則幾其出入以時啟閉凡外內命夫  
命婦出入則爲之闢掌婦門庭大祭祀喪紀之事設  
門燎蹕宮門廟門凡賓客亦如之

又寺人曰掌王之內人及女宮之戒令相道其出入  
之事而糾之若有喪紀賓客祭祀之事則帥女宮而  
致于有司佐世婦治禮事掌內人之禁令凡內人弔  
臨于外則帥而往立于其前而詔相之

惠氏曰此職皆掌禁止

爲羊

說文曰羊祥也从𦍋象頭角足尾之形孔子曰牛羊

之字以形舉也

虞作羔鄭本作陽惠氏曰虞云羔女使取位賤故爲羔舊讀羔爲羊非也

鄭云此陽讀爲養无家女行賃炊爨今時有之賤于妾也○按廝役廬養見公羊傳意卽今之使女惠氏曰九家乾後有四爲龍爲直爲衣爲言坤後有八爲化爲迷爲方爲囊爲裳爲黃爲帛爲漿震後有三爲王爲鵠爲鼓巽後有二爲楊爲鶴坎後有八爲宮爲律爲可爲棟爲叢棘爲狐爲蕤藜爲桎梏離後有一爲牝牛艮後有三爲鼻爲虎爲狐兌後有二爲常爲輔頰又曰虞氏傳其家五世孟氏之學八卦逸象十倍於九家如乾逸象六十一爲王爲神爲人爲聖人爲賢人爲君子爲善人爲武人爲行人爲物爲敬爲威爲嚴爲道爲德爲信爲善爲良爲愛爲忿爲生爲慶爲祥爲嘉爲福爲祿爲積善爲介福爲先爲始爲知爲大爲盈爲肥爲好爲施爲利爲清爲治爲高爲宗爲甲爲舊爲久爲古爲畏爲大明爲晝爲遠爲郊爲野爲門爲大謀爲道門爲百爲歲爲朱爲頂爲主爲蓄坤象八十一爲妣爲民爲刑人爲小人爲鬼爲

尸爲形爲自爲我爲躬爲身爲拊爲至爲安爲康爲  
富爲財爲積爲重爲厚爲基爲致爲用爲包爲寡爲  
徐爲營爲下爲裕爲虛爲書爲永爲邇爲近爲思爲  
默爲惡爲禮爲義爲事爲類爲閉爲密爲恥爲欲爲  
過爲醜爲惡爲怨爲害爲終爲喪爲死爲殺爲亂爲  
喪期爲積惡爲冥爲晦爲夜爲暑爲乙爲年爲十年  
爲盍爲戶爲闔戶爲庶政爲大業爲土爲田爲邑爲  
國爲邦爲大邦爲鬼方爲器爲缶爲輻爲虎爲黃牛  
震象四十九爲帝爲主爲諸侯爲人爲行人爲士爲  
兄爲夫爲元夫爲行爲征爲出爲逐爲作爲興爲奔  
爲奔走爲驚衛爲百爲言爲講爲議爲問爲語爲告  
爲響爲音爲應爲交爲懲爲後爲世爲從爲守爲左  
爲生爲緩爲寬仁爲樂爲笑爲大笑爲陵爲祭爲墜  
爲草莽爲百穀爲麋鹿爲筐爲趾坎象四十七爲雲  
爲元雲爲大川爲志爲謀爲惕爲疑爲恤爲逝爲悔  
爲涕洟爲疾爲災爲破爲罪爲悖爲欲爲淫爲獄爲  
暴爲毒爲虛爲潰爲孚爲平爲則爲經爲法爲聚爲  
聚爲習爲美爲後爲入爲納爲臂爲腰爲膏爲陰夜

爲歲爲三歲爲酒爲鬼爲校爲穿木爲弧爲弓彈艮  
象三十七爲弟爲小子爲賢人爲童爲童僕爲官爲  
友爲道爲時爲小孤爲狼爲碩爲碩果爲慎爲順爲  
待爲執爲厚爲求爲篤實爲穴居爲城爲宮爲庭爲  
廬爲牖爲居爲舍爲宗廟爲社稷爲星爲斗爲沫爲  
肱爲背爲尾爲皮巽象二十爲命爲詰爲號爲隨爲  
處爲利爲商爲同爲歸爲交爲白茅爲草莽爲草木  
爲薪爲帛爲墉爲牀爲桑爲蛇爲魚離象十九爲黃  
爲見爲飛爲明爲光爲甲爲孕爲戎爲刀爲斧爲資  
斧爲矢爲黃矢爲罔爲鶴爲鳥爲飛鳥爲變爲瓶兌  
象九爲友爲朋爲刑爲刑人爲小爲密爲見爲右爲  
少知以上逸象共三百二十三義備疏中○按以上  
均係徵君列之說  
卦傳後今仍之

周易經典證略 卷九

序卦傳

蒙者蒙也物之穉也

周禮秋官薙氏曰掌殺草春始生而萌之

江氏曰齊人謂蒙爲

萌廣雅釋詁萌芽始也

謂萌爲蒙聲之近也

文選幽通賦曰咨孤蒙之眇眇兮

曹大家曰蒙童蒙也

需者飲食之道也

周禮天官亨人曰掌其鼎鑊以給水火之齊

江氏曰需坎上

乾下中互體離坎水離火有烹飪之象也

故受之以訟

禮記曲禮曰分爭辨訟非禮不決

師者衆也

爾雅釋詁曰師衆也

比者比也

爾雅釋詁曰弼棐輔比輔也

論語曰君子周而不比

孔安國註曰忠信爲周阿比爲黨

物畜然後有禮

爾雅釋言曰履禮也

臨者大也

靈樞經通天篇曰太陰之人其狀黥黥然黑色忿然下意臨臨然長大矜然未儻此太陰之人也

賁者飾也

詩小雅白駒曰皎皎白駒賁然來思

毛傳曰賁飾也

有无妄然後可畜故受之以大畜

春秋傳曰右宰穀曰獲罪于兩君天下誰畜之

襄公二十

六年

離者麗也

禮記王制曰凡制五刑必卽天論郵罰麗于事

郵與尤同

有君臣然後有上下有上下然後禮義有所錯

禮記曲禮曰君臣上下父子兄弟非禮不定

恆者久也

禮記郊特牲曰壹與之齊終身不改故夫死不嫁

遯者退也

漢書敘傳下曰張陳之交旂如父子攜手遂秦拊翼

俱起

師古曰遂古遯字

萃者聚也



詩國風墓門曰墓門有梅有鵲萃止

毛傳曰萃集也

故受之以鼎主器者莫若長子

儀禮少牢饋食禮曰羹定雍人陳鼎五三鼎在羊饌之西二鼎在豕饌之西

又有司徹曰司宮攝酒乃爇尸俎卒爇乃升羊豕魚三鼎無腊與膚乃設局俎陳鼎于門外

江氏曰故知祭祀用鼎也

長子主祭者○  
按爇音尋溫也

長者止也

大學曰知止而后有定

得其所歸者必大

詩召南江有汜曰之子歸

鄭氏曰婦人謂嫁曰歸

故受之以旅

春秋傳曰齊侯使敬仲爲卿辭曰羈旅之臣幸若獲  
宥及于寬政赦其不閑于教訓而免于罪戾弛于負  
擔君之惠也所獲多矣敢辱高位以速官謗請以死

告

莊公二十二年

兌者說也

詩衛風氓曰士之耽兮猶可說也

故受之以節

禮記樂記曰大樂與天地同和大禮與天地同節

故受之以中孚

春秋傳曰信不由中質無益也

隱公三年

禮記聘義曰孚尹旁達信也

有其信者必行之

論語曰人而無信不知其可也大車無輶小車無輶

其何以行之哉

故受之以既濟

春秋傳曰宋襄公欲合諸侯臧文仲聞之曰以欲從

人則可以人從欲鮮濟

僖公二十

年

周易經典證略 卷十

雜卦傳

比樂師憂

春秋傳曰惟聖人能內外無患自非聖人外甯必有

內憂

成公十六年

井通而困相遇也

周禮春官大宗伯曰冬見日遇鄭註曰遇偶也江氏曰六三無匹求偶于

四

離上而坎下也

書洪範曰水曰潤下火曰炎上

履不處也

論語曰富與貴是人之所欲也不以其道得之不處也

大過顛也

說文曰顛頂也

江氏曰過涉滅頂顛也

漸女歸待男行也

儀禮士昏禮記曰宗子無父母命之親皆沒己躬命

之支子則稱其宗弟則稱其兄

江氏曰艮漸之下卦漸反成歸妹則兌爲

妹震爲兄矣蓋少男少女本諧匹配若無父兄之命終屬苟合所以必待震兄爲主婚也

周易經典證略 卷末

卦氣起中孚圖

中月午	中月巳	中月辰	中月卯	中月寅	中月丑	中月子
公咸	公小畜	公革	公解	公漸	公升	公中孚
辟姤	辟乾	辟夬	辟大壯	辟泰	辟臨	辟復
侯鼎內	侯大有內	侯旅內	侯豫內	侯需內	侯過內	侯屯內
節月未	節月午	節月巳	節月辰	節月卯	節月寅	節月丑
侯鼎外	侯大有外	侯旅外	侯豫外	侯需外	侯過外	侯屯外
大夫豐	大夫家人	大夫師	大夫訟	大夫隨	大夫蒙	大夫謙
卿渙	卿井	卿比	卿蠱	卿晉	卿益	卿睽



中月亥	中月戌	中月酉	中月申	中月未
公大過	公困	公賁	公損	公履
辟坤	辟剝	辟觀	辟否	辟遯
侯濟未內	侯艮內	侯歸妹內	侯巽內	侯恆內
節子	節亥	節戌	節酉	節申
侯濟未外	侯艮外	侯歸妹外	侯巽外	侯恆外
大夫蹇	大夫既濟	大夫无妄	大夫萃	大夫節
卿頤	卿噬嗑	卿明夷	卿畜大	卿同人

# 納甲值月候圖



三日震

出庚



八日兌

見丁



十五乾

盈甲




十七巽

退辛



廿三 艮

消 丙




三十 坤

滅 乙 癸



晦朔 坎

流 戊



日中 離

就 己 壬

# 爻辰簡明圖

初九 配黃鍾 辰在子 值元枵

六四 配大呂 辰在丑 值星紀

九二 配太簇 辰在寅 值析木

六五 配夾鍾 辰在卯 值大火

九三 配姑洗 辰在辰 值壽星

上六 配中呂 辰在巳 值鶉尾

九四 配蕤賓 辰在午 值鶉火

初六 配林鍾 辰在未 值鶉首

九配夷則 辰在申 值實沈

六配南呂 辰在酉 值大梁

上配無射 辰在戌 值降婁

六配應鍾 辰在亥 值娵訾

消息簡明圖

乾消息六卦

復 息

息○生升明夷解震

臨

息○生井既濟損歸

泰

妹節賁旅蠱隨

反三三否

生小過

觀

消○生晉艮

剝

消

坤

消○生謙履師同人比大有離坎屯鼎

復

陽盈

坤消息六卦

䷁ 姤 消

䷋ 遯 消 ○ 生无妄訟家人巽

䷋ 否 消 ○ 生困未濟漸咸 反 ䷊ 泰 生中孚

䷗ 大壯 息 ○ 生需兌

䷪ 夬 息

䷀ 乾 息 ○ 生豫小畜萃大畜蹇睽大過頤蒙革

䷫ 姤 陰虛

張編修惠言曰卦變消息蓋孟氏之傳也荀氏亦言之而不能具其他則多舛矣其法有爻之有旁通有消息卦有消息所生之卦注雖殘缺考約求之蓋乾坤十二辟卦爲消息卦之正其自臨遯否泰大壯觀生者謂之爻例自乾坤生者不從爻例每二卦旁通則皆消息卦也消息卦皆在乾坤相合之時則剝復夬姤泰否之交也



男福震孫

林炳壬森源

森曾孫法庚同校刊